



# PETIT ADVIS,



A FRANCE est partie en deux, Catholiques & Huguenots, tous deux en paix également obeyssans au Roy : mais aujourdhuy non esgallement obeyssans sous pretexte de la guerre & à cause d'icelle.

y

La guerre est commencee contre les Huguenots. La proposition ou de la cōtinuation d'icelle ou de la paix avec eux, partit les esprits & des vns & des autres pour estre vne des deux ou creuë bonne, ou desirée.

Du costé des Catholiques ceux qui croiēt bonne la proposition de la guerre, & en soustiennent l'affirmative, sont les innocens Ecclesiastiques, tous les zelez Catholiques, les Religieux qui ne sentent point les incōmoditez de la guerre, & quelques bons Politiques qui croient par raison d'estat que ceste guerre se doit faire iustemēt, & se peut faire vtilement.

50

Ceux qui ne l'approuuent pas en leur cœur, neantmoins la desirēt & y poussent,

A

ap. 16 22

sont nos vñsins enuieux & desirans nostre ruine, & leurs partisans, ceux qui ont & esperent auoir les grandes charges, l'autorité & pouuoir dans les Prouinees, dās les villes, ou dans les armees, les Gouvernemens des places, & autres conditions qui haultseront leur rang: plus tous les pillards, les sacripants, picoreurs, soldats de terre ou de mer, & toutes autres personnes qui vivent de rapine.

Tous ceux - là se fortifient de l'aage, de la pieté, & de l'humeur altiere & genereuse du Roy, qui est la premiere & plus forte piece de ce desseing. Ceux qui ne l'approuuent & ne la desirent pas, sont tous les sages & bons François, qui bien que ceste guerre puisse estre iugee bonne en soy, n'est pas neantmoins iugee bone par eux, prise à contre temps, comme ils la croiēt, & est ceste croyance esgalle aux sages & non interessez, & à tous ceux qui vivent d'ordre & de reigle de tons les deux costez. Ceux-là se fortifient de leur part de la sincere bonté & de la prudence du Roy, & de la creance & foy qu'ils estiment qu'il donnera aux bons conseils, par le poids de laquelle secondes vertus qui sont esgallement cogneuës en luy, ils esperent que la balance de ses entreprises qui par la force des premieres lors seules mesurees, auoit esté violemment emportee, se ramenera au



moins iusques à son esgalle & iuste assiette pour en determiner par luy à son honneur & aduantage, & bien de son Estat.

Ceux qui desirent & promeuuent la guerre, maintiennent qu'elle est Honorable.

Vtile non seulement en la fin, mais aussi en son entreprise presente.

Iuste.

Necessaire.

Ceux qui desirent la paix, & la voudroient bien promouuoir, disent que toutes ces qualitez se doiuent & peuuent donner plus certainement & plus essentiellement à la paix.

Les raisons alleguees pour la guerre, sont qu'elle est honorable, 1. Parce qu'il s'agist de l'honneur de Dieu, de la deffence de l'Eglise, de laquelle le Roy comme Roy Tres-Chrestien, est le fils aîné, protecteur de ses droits par succession, dignité, & serment.

2. L'exemple des bons Roys ses predecesseurs, qui ont heureusement & glorieusement estouffé dans leur Estat l'heresie des Albigeois, & autres naissantes.

3. Honorable à vn ieune Prince qui n'a aucune guerre avec ses voisins, n'en peut auoir contre les infidelles, desquels il est si esloigné, que pour n'auoir ny le temps ny les lieux propres pour leur faire la guerre.

A ij

re, il s'en dispense aussi avec honneur, pour le moins sans blasme.

4. Qu'il doit commencer d'estendre le vol de sa renommee par l'extirpation d'une secte qui s'esleue non seulement contre Dieu, mais aussi contre l'autorité Royale.

5. Honorable encorés à ceste heure, & par exemple d'un costé, & quasi par necessité de l'autre, parce que depuis deux ans il a eu & de l'advantage en ses desseins & du desadvantage, & tous les deux l'obligent esgallement d'honneur à recommencer la guerre. L'advantage qu'il a eu par l'esperance du pareil, le desadvantage par le desseing du chastiment & de la vengeance.

6. Honorable en ce qu'il ne peut quasi s'en empescher sans blasme, ou de peu de pieté, ou de peu de ressentiment de l'offense, ou de peu de forces & de puissance pour s'en pouvoir vanger, chacune desquelles reproches seroit capable de toucher son ieune & magnanime cœur d'une si vifue atteinte, qu'elle luy deuroit faire entreprendre d'aller manger les murs de Constantinople avec les dents.

7. Honorable pour un fils aîné du Grand Henry IV. qui par malheur nay, nourry, & esleué dans l'heresie, eut neantmoins la grace de Dieu, de s'affermir sur sa teste a-



5  
uec sa valeur & avec son espee la Couronne de tout son Royaume, que la perfidie de la plupart des François ou esblouys, ou abusans du pretexte de la Religion Catholique, luy vouloit arracher. A plus forte raison son fils aîné sorty de S. Louys, nay & nourry dans la Religion Catholique, auioird'huy semble obligé de reconquerir vne petite partie de son Royaume, qui sous pretexte d'une Religion faulce, & condamnée, luy desnie la iuste obeyssance qu'elle luy doit.

Vtile.

1. Premièrement en sa fin, en ce que si le Roy peut oster ce chancre qui a pris racine dans son Estat, il se descharge d'infinies despences qu'il faut qu'il soustienne par eux, ou pour eux.

2. Qu'alors n'y ayant plus nulle teste de party formé, ny par consequent nul pretexte à personne de se pouuoir rebeller, chacun obeyra par tout à ses loix & à ses commandemens.

3. Qu'il pourra d'oresnauant avec petite despence gouverner les grandes affaires de son Royaume, retranchant toutes excessiues qui ont pour pretexte qu'il faut estre tousiours préparé en cas qu'il arriuaist quelque souleuement qui ne peut auerir que par eux.

4. Qu'on ne craindra plus que les estran-

gers qui ont eu par eux quelquefois entree en ce Royaume, y puissent sous leur pretexte y mettre le pied à l'aduenir.

5. Vtile en son dessein & en son entreprise presente, parcequ'estans aujourdhuy les Huguenots dissipez & mal vnis, n'aians point de chef general, & n'en pouuans auoir vn assez puissant, il semble impossible qu'ils puissent resister au party Catholique beaucoup plus grand & plus fort, commandé par vn chef vigoureux, present en personne, assisté d'hommes, d'armes, de moyens, d'equipage, de suyte digne de luy, & proportionnée à sa grandeur, qui a eu d'heureux augures & commencemens de ses victoires les années passées ! ha la faueur de Dieu visible & apparète, les vœux du Royaume, l'amour de tous, & l'obeyssance prompte de ceux qu'il y voudra employer.

6. Que les deux plus signalez & estimez chefs qu'ils ayent, sont iusques icy demeurés fidelles, l'un seruant actuellement le Roy contre eux mesmes, l'autre viuant dans sa maison avec demonstration qu'il ne veut en façon quelconque tremper dans la desobeyssance du party. D'ailleurs tous deux d'age, & de santé, qu'il semble qu'en tout cas ils ne peuuent faire guerres de mal : leurs autres chefs ou encores peu experimentez, ou avec si peu de créance



7

generalle, qu'il ne faut pas craindre qu'ils  
puissent resusciter les cendres d'un Admi-  
ral de Colligny.  
Iuste.

1. Premièrement en ce qu'elle est ho-  
norable & vtile, car toutes choses qui ont  
ces deux qualitez ensemble, ne peuvent  
estre que tres iustes.

2. En ce que contre toute raison les Hu-  
guenots veulent estre deschargez en beau-  
coup de choses de l'obeyssance entiere &  
absolue, à laquelle comme subiects ils  
sont tenus, & que les subiects Catholiques  
rendent; & auoir des priuileges particu-  
liers que les Catholiques n'ont pas: ce qui  
est iniustice à souffrir, iustice à oster & ar-  
racher.

3. Car encores que le Roy comme Roy  
puisse donner des priuileges & libertez à  
quelques vns, & les deniers aux autres; si est  
ce qu'il ne le peut faire sans quelque iniu-  
stice, s'il n'y a raison apparente de le faire.  
Or quelle raison y a il que le Roy paye aux  
Huguenots comme Huguenots leurs gar-  
nisons, Ministres & Colleges, leur fournis-  
se des lieux, de temples, & de cymetieres,  
leur permette des Assemblies, des Cercles,  
des Deputez, & finalement leur donne des  
villes, & qu'il n'octroye nulle de ces choses  
aux Catholiques comme Catholiques.

4. Pour les villes de seureté ou de ma-

riage, lesquelles n'ayans esté donnees qu'à temps, il est raisonnable qu'elles soient remises entre les mains du Roy, neantmoins sont par eux retenues de force & d'autorité.

5. Qu'il est iuste qu'ils dependent de la foy & parole du Roy, non le Roy de la leur: car bien qu'ils pretextent la seureté de leurs vies, premierement leur vie ne leur peut estre plus chere, & ne doit estre par eux tenue plus chere qu'est au Roy sa parole & son autorité. Secondement leur seureté sera plus grande quand le Roy sera caution de leur seureté, que s'ils le sont eux-mêmes, puis qu'il n'y a rien en France de seur à qui n'est pas sous la protection du Roy.

Necessaire.

1. Des trois perues qu'elle est honorable, utile, & iuste, résulte la quatriesme, qu'elle est necessaire: Car c'est vne espece de necessité de suiure par dessein formé ce qu'on cognoist apparemment honorable, utile, & iuste.

2. Necessaire, parce que si à ceste heure qu'on a apparent aduantage sur eux, on n'essaye de leur oster tout moyen de pouuoir iamais se rebeller, ils se tireront à la longue de l'obeissance dans laquelle on ne les pourra plus remettre.

3. Et selon les occasions entreprendront de



de nous venir eux-mesmes attaquer & chercher à nous accabler.

A TOUTES ces raisons se peut respondre.

Aux raisons de l'honorable.

A la premiere qui regarde l'honneur de Dieu & la deffense de l'Eglise, se respond que ceste raison est vraye en loy, mais parce que l'honneur du gouuernement des Estats & de la guerre ne se prend pas seulement de la cause, mais aussi de l'issue, voire mesme que le plus souuent la renommee de l'issue engloutit celle du conseil, & du dessein, lequel est quasi tousiours ou loüé, ou blasmé par l'issue, en si grandes actions, il faut püser & l'issue autant qu'on la peut preuoir par les moyens qu'on y employe, & les moyens aussi pour y paruenir, & sur le tout bien examiner le dessein. La guerre des Chrestiens qui sont dans Constantinople ou dans Ierusalem, pour oster la domination de la ville aux infideles, seroit honorable en son dessein : Mais parce qu'elle est iuge impossible, elle n'est pas tentee d'eux, parce que le dessein ne pourroit auoir certitude d'vne honorable issue.

A la seconde qui se prend de l'exemple des bons Roys du passe, se respond que les Roys qui ont de leur temps exterminé les heresies qui se trouuoient dans leur Estat,

en ont pris le dessein lors qu'ils ont veu que cela se pouuoit aysément faire, sans grande perte ny despence, & de fait on voit par les Histoires que ce fut plustost simple punition & chastiment, que guerre. Auioird'huy il faut y aller avec autre dessein, estans les choses en autres termes.

A la troisieme, qui se tire de la paix que le Roy entretient avec les infideles, se respond. Que si le Roy ne prend pas conseil de faire la guerre aux infideles, les guerres de son Royaume en sont peut-estre cause: si son Estat estoit tout à fait en paix, il auroit temps & moyens de faire la guerre aux infideles aussi louïablemēt & plus heureusement, & peut estre que ceste guerre là rameneroit à l'obeissance tous les desobeïssans de son Estat.

A la quatriesme fondee sur l'honneur de Dieu, & sur l'autorité Royale, qui toutes deux semblent attaquées & blessées; Se respond que il est vray que ceste secte s'esleue contre Dieu, puisque contre son Eglise, & s'esleue encores contre l'autorité Royale en quelque façon: mais il y a & conseil de Dieu mesmes, d'en venir à bout, pour ce qui le regarde, autrement que par la violence, & le Roy peut de mesmes prendre conseil d'en venir à bout pour ce qui le regarde, autrement que par la violence aussi.



A la cinquiesme, qui se prend avec ce que le Roy a eu les deux anne'es dernieres, se respond, Que le Roy a eu trois sortes d'yssues en ces entreprises depuis deux ans, quelques villes luy ont volontairement ouuert les portes, comme Nauarrins, Pons, Bergerac, & plusieurs autres, quelques vnes ont esté prises par luy, par sieges; cōme saint Iean, Clerac, & autres. Montauban luy a resisté.

Sur toutes les trois sortes, il peut prendre sage conseil de n'employer pas la force cy apres: De la premiere, parce que toutes les places qui luy voudront rendre obeissance volontaire, il doibt les traicter si favorablement, que non seulement elles se treuuent heureuses d'auoir pris ce bon chemin, mais y induisent les autres par exemple, encores qu'en rendant l'obeissance elles ne payent que ce qu'elles doiuent, il ne faut pas laisser de leur dire grand mercy de bon cœur, comme on fait à vn mauvais payeur, qui vous payant volontairement, vous espargne le temps, la peine, & la despēce. Tout ce que le Roy peut auoir de ses subiects par amour, bien que le plus iuste du monde, il ne faut iamais qu'il essaye de l'auoir par force.

La premiere & plus certaine iustice, est de receuoir doucement & gracieusement ce qu'on donne gayement & volontaire

ment. Dieu luy-mesme en vse ainsi.

De la seconde, le Roy doit mesurer non ce qu'il a gagné en prenant vne ville, mais ce qu'il a perdu: car il ne gagne rien quand il prend vne ville dans son Royaume, & il perd tout ce qu'il employe pour la prendre; & qui plus est, il perd encores tout ce qui s'employe dedans pour la deffendre: Car tout estant à luy dehors & dedās, tout vient au bout du compte à la perte.

De la troisieme, qui auroit bonne seurété de pouuoir forcer Montauban pour luy faire payer la rebellion de l'annee passée, il y auroit apparence d'en prendre le dessein, pourueu que ce fut avec biē moindre perte que celle qu'on y feist l'ānee passée sans le prendre. Mais rien de tout cela n'est asseuré, supposé qu'il le fust, vn Prince sage ne gouuerne gueres son Estat par les ressorts de la vengeance. Ouy peut-estre enuers les voisins ou estrangers; enuers ses propres subiects, non, ie n'en ay iamais veu d'heureux exemples: le feu Roy s'y prenoit d'vn biais tout contraire, & s'en trouua bien.

A la sixiesme, qui se prend des bruits qui pourroient courir, si le Roy terminoit la guerre commencee par vne conclusion de paix; Se respond que le bruiet de peu de pieté à vn Roy si deuot, ou de peu de magnanimité à vn Roy si courageux, ou de



foiblesse & de peu de force à vn si grand & puissant Roy, ne peut prendre pied ny s'estendre aux lieux où l'humeur du Roy & ses forces sont cogneues. Si ce bruiet court en quelque endroit, il sera aysé de iustifier qu'il vient de ceux mesmes qui par haine, enuie, ou dessein qu'ils ont par interest particulier contre le bien du Royaume, cherchent de continuer le Roy en vne humeur qu'il n'a que trop, non de pieté, de magnanimité ou de force: Car vn Roy n'en peut trop auoir, mais d'effets non reiglez, de pieté, de magnanimité, & de puissance. On trouuera que les Espagnols qui durant nos diuisions s'agrandissent dans nostre voisinage, & nous ayans bouché les passages de la Valtoline & de Iuliers, se preparent ce pendant que nous inuestirons Montauban ou la Rochelle, d'inuestir nostre Royaume tout à l'entour, feront courir ce bruiet là par aduance par leurs partisans: A tels bruiets on pourra doucement respondre que c'est vne vraye pieté à vn Roy de prendre vne voye de gagner, & cōuertir avec le temps tant d'ames desuoyees, que nulle force ne peut vaincre en ce qui est de la foy & de la croyance, au contraire les fait endurcir & opiniastrec. Magnanimité & puissance de se faire ouurir les portes de ses villes à vn seul commandement, & avec la croye d'vn

Mareschal des logis, que toute la Chrestienté ne feroit pas ouurir avec des balles de canon. Hors du Royaume, il seroit plus honorable au Roy d'estre victorieux: Dans le Royaume, il luy est plus honorable d'estre obey.

A la septiesme, qui se prend de la memoire & de l'exemple des faits du feu Roy se respond, Que le feu Roy reconquit sans doute par sa valeur son Royaume contre ceux qui luy refusoient obeyssance. Mais on peut dire qu'il le reconquit aussi par sa douceur, bonté, & prudence. Si les Huguenots refusoient absolument au Roy l'obeyssance ou la recognoissance, il faudroit que toute la Frâce ensemble courust les exterminer dans leurs tannieres: s'ils demandent en termes de subiects d'obeyr, presuppposé qu'ils desirerent quelques conditions qui ne sont en soy raisonnables à eux à demander, le Roy ne laisse d'auoir raison de leur accorder, s'il luy plaist: Les Roys precedans les ont approuuees, le Royaume les a supportees. Faire en vn instant vn changement tout entier, est tres-mal ayse. Conuertir tous les heretiques en mesme temps, est impossible: leur oster absolument la crainte & la defiance l'est encores plus: leur dōner ce qu'ils n'ont point eu iusques icy, qui est le desespoir & le mespris de l'authorité Royale, est tres pe-



rilieux: Nous vîmes durant la Ngue que le  
feu Roy peu à peu assura les deffiances,  
osta les staintes, fit esuanouyr les soup-  
çons; par ce moyen regna puïssamment sur  
tous.

Aux raisons apportees pour l'vtilité se  
peut respondre: Aux quatre premieres qui  
se tirent des biens & commoditez dont  
iouyroit le Royaume, si sās aucun schisme  
ou diuision de religion il se maintenoit en  
paix, sous l'obeyssance d'vne seule Eglise,  
dans la suiection deuë au Roy: Se respond  
qu'il y a difference à mesurer ce qui sera  
vtile quand il sera faict, ou ce qui sera en-  
trepris vtilement. Il n'y a gueres d'hom-  
mes à qui il ne fut vtile d'auoir vne maison  
bastie, il y en a peu à qui il fust vtile d'en  
bastir vne. Ainsi les quatre premieres rai-  
sons sont ou vrayes, ou vray semblables en  
leur fin, presuppsee certaine, mais non en  
leur entreprise: partant ce qui est mis en  
question est certain à desirer, mais fort  
problematicque à conseiller, encores plus à  
esperer.

A la cinquiesme qui se prend de la foi-  
blesse qui se recognoist dans le party Hu-  
guenot, & au contraire la force, puïssance  
du party Catholique, appuyé de l'authori-  
té Royale, & commandé par vn Roy tel  
que nous l'auons. Se respond que toutes  
ces rencōtres sont veritables & certaines:  
Aucc cela l'exemple de l'annee passée est

capable de partir le conseil. Croïe & Vienne furent autrefois la proye imaginee de deux tres-puissants Monarques : autre fut l'issue. Dieu ne iuge pas tousiours comme les hōmes : quelquefois il fauorise par iustice manifeste , quelquefois par volonte particuliere. Le Roy n'a pas droict mieux fondé dans S. Iean, que dans Montauban. Dieu luy soubmît la premiere, & non la seconde. Il veut que nous esperiōs tout en luy, neantmoins il ne veut que nous prenions nos desseings que proportionnez aux moyens humains qu'il nous donne, car il nous les donne pour sur iceux & suivant iceux entreprendre & former tous nos desseings.

A la sixieme qui marque que les deux chefs plus estimez , dont les Huguenots puissent faire estat, sōt iusques au iourd'huy fideles & obeysāns au Roy; Se respond que cela est encore veritable, mais cest aduantage doit estre plustost employé au dessein de la paix que de la guerre: nul des deux ne fera mal pourueu qu'on le mesnage biē: L'un le tenant dans la fidelité qu'il a de nouveau promise au Roy, sans luy dōner ny occasion ny moyen de s'en departir : L'autre, luy donnant & occasion & moyen nō seulement de ne point mal faire, mais au contraire, de bien faire. Au premier, on ne peut luy offer ny le moyen, ny la volonte de mal faire,

17  
faire, quoy qu'o die qu'en le rendât instru-  
ment de la paix, à laquelle il pourra & vou-  
dra travailler vtilemēt. Dans la guerre, il fe-  
ra du mal asseurement, il y alieu de l'em-  
ployer honorablement à la Valtoline, avec  
vne partie de ceux qui ayment la guerre tāt  
d'un party que d'autre. C'est le cōseil qu'il  
faut prendre. Pour l'autre, on s'en doit ser-  
uir comme d'un instrumēt à toute sorte de  
bien, si on le sçait bien employer. Pour cet  
effect, semble que le Roy prendra vn tres-  
bon conseil de luy faire sçauoir par vn hō-  
me fidele & sage, qu'ayant en estime sa ver-  
tu, la prudence & la conduite, qui sont ap-  
puiees & rehaussées de sō honorable quali-  
té & maisō, il le prie d'y adiouster sa cōuer-  
sion à la Religion Catholique, auquel cas il  
desire le tenir aupres de luy, avec charge di-  
gne de lui, & il n'y en a qu'une de cete sorte.

Si cet hōneur est accepté de luy, outre le  
bon œuvre d'auoir tiré ce grand homme à  
la Religion, on peut esperer de luy diuer s  
bōs seruices & dās le Royaume & dehors.  
Il peut empescher diuers petits orages, qui  
(tel temps courroit) viendroient fondre de  
diuers costez sur nous. Desia void-on vne  
petite nuee noire sur la frontiere qui nous  
pourroit bien donner vn esclat de tonner-  
re, si nous nous escartons trop de la maison.

Il seruira d'espece de liaison (dont il ne se  
trouue quasi aucune) entre les humeurs des



zelez Catholiques & des frenetiques Huguenots, d'assurance & de confiance aux sages des deux partis. Ouurira des chemins d'obeissance des subiects enuers le Roy, de reconciliation du Roy enuers ses subiects, qui seront agreables à tous les deux, & louiez des estrangers & accourcira bien le chemin. En paix fera diuerses bonnes choses, il est en condition d'aage & de santé, qu'il ne peut faire mal, & peu faire beau coup de bien. Quand sa volonté n'y contribueroit rien (ce qui ne se peut imaginer d'un homme de qualité, interessé par parentelles & biens, & protection de sa ville, qui ne peut subsister que par la bienueillance du Roy dans le bié du Royaume) tousiours le rang qu'il tiendrait, l'estat en quoy il est, le soing de ses enfans, & l'honneur qu'on lui auroit fait ne luy permettroient de laisser inutiles les graces & moiens de seruir qu'il a, qui ne sont pas petits. Tousiours est-il le premier Officier.

Si son opiniaistreté ne luy laissoit pas accepter cet offre, tousiours le Roi seroit loué du dessein & du choix de telle personne, & de la mesme offre Catholiques & Huguenots en auroient esgal contentement: nul des deux partis ne se plaindrait qu'on auroit choisi vne personne au dommage & à la ruine de l'autre party, ou vne personne indigne, & tousiours cela seruiroit.

Aux raisons pour la iustice se peut respondre.

A la premiere, qui porte que si la guerre est honorable & vtile, elle est par cōsequēt iuste; Se respōd que la iustice en gouuernemens d'estats, tombe tousiours à ce qui est le plus vtile, & le plus expediēt pour l'estat: car le Roy est tenu par reigle de iustice de procurer sur toutes choses le bien de son Royaume.

A la 2. qui regarde les aduantages extraordinaires que les Huguenots veulēt auoir, & lo<sup>r</sup> pretexte d'iceux se desgager en quelque sorte de la subiection & obeissance absolue, ce qui ne doit estre souffert; Se respōd qu'il est vrai si cela se pouuoit faire sās vn plus grād mal, & vne plus grande perte.

A la troisieme, qui marque les priuileges particuliers que les huguenots veulēt auoir en qualite d'huguenots, qui sont leurs garnisons, pensions de Ministres, Colleges, lieux de Temples, & de cimetieres, Assemblees, & Cercles, qui semble iniuste de leur permettre & souffrir; Se respōd que cela est aussi tres-vray: mais c'est avec le temps & la d'exterite qu'il faut venir à bout de tout cela, & non avec la force qui peut estre n'y feroit rien, & porteroit la chose aux extremittez.

A la quatrieme qui regarde les villes de seureté qu'ils ont qui doiuent estre remises.

entre les mains du Roy; Se respond que cela se doit encores faire avec dexterité & tēps, en telle sorte que le Roy obeï & seruy, leur crainte ostee par la parole que le Roy leur gardera toutes choses reuiennent au plus pres que faire se pourra de leur premier estre.

A la cinquiesme fondee sur la confiance absolue qu'ils doient prendre en la parole du Roy, de laquelle leur seureté doit entierement depēdre, & eux s'y soumettre clairement; Se respond qu'il est raisonnable, aussi feront ils tousiours quand ils demeureront sous la iurisdiction & obeyssance du Roy, de leur pouuoir persuader quand bien ils s'asseureroient de la parole du Roy, qu'ils se peuuent assurer contre la mutinerie des peuples, de laquelle ny le Roy, ny les peuples mesmes, ne scauroient donner assurance autre que celle qu'ils en ont eue iusques à ce iourd'huy; cela est malayse. Aux raisons pour le necessaire, Se respond.

A la premiere, qui se tire de l'honneur, vtilité & iustice, presuppsee de la guerre, Que la consequence est veritable, mais il n'est pas question icy de ce qui est cogneu honorable, iuste, & vtile en sa fin imaginee certaine, mais de ce qui l'est en l'entreprise quel'on fait de l'executer. La redemption de tous captifs Chrestiens qui sont entre les mains des infideles, ou l'affranchisse-



ment du S. Sepulchre, seroient honorables, vtils, & iustes: mais les moyēs qu'y pourroit employer vn Prince seul, ne seroient iugez peut estre, ny honorables, ny vtils, ny iustes, parce qu'ils ne seroient pas iugez suffisans pour en venir à bout.

A la seconde, qui regarde la fin, que peut estre les Huguenots prennēt pour le but de leur guerre, qui est de se retirer à la longue del'obeyssance du Roy; Se respond, que peut estre s'ils en auoient le moyen ils le teroient voirement: L'exemple en est parmy nos voisins, mais il faut examiner si le remede qu'on essayeroit d'y donner par la guerre y seroit suffisant, & pourroit retarder ce malheur, ou plustost l'aduācer: si par la guerre on les porte au desespoir, du desespoir aux derniers efforts, & des derniers efforts à quelque effect extraordinaire.

A la troisieme, qui pre-suppose qu'à la fin si on laisse les Huguenots en paix, eux mesmes no<sup>9</sup> viendront attaquer, Se respōd, qu'aux termes où sont les affaires en Frāce, & encorē par toute la Chrestieté, s'imaginer que les Huguenots puissent quelque iour estre capables de donner la loy au surplus du Royaume, c'est estre hors du sens. En la personne du feu Roy, si vaillāt & si magnanime, ceste doute fut esclaircie, si cela eust peu auoir lieu, c'eust esté par ses mains. Le bon Capitaine la Nouë luy dit au siege de

Chartres en presence de quantité d'hommes des deux Religions, qu'il deuoit tenir deux maximes pour certaines & indubitables, l'une Que iamais Huguenot ne seroit Roy absolu de France, l'autre Que iamais les Huguenots ne porteroiēt plus auant les armes en guerre ciuile, qu'à la cōseruation de leur liberté de conscience : ceste parole sortie de la bouche d'un homme grandement estimé de tous, & plus que de nul autre, le Roy mesme, le persuada puissamment & l'achemina à deux resolutions, l'une bonne, qui fut de se faire instruire, qui fut un grand bien pour le Royaume, & un plus grand pour luy; l'autre mauuaise, qui fut de se relascher iusques-là par confiance, qu'estant paisible, il permit aux villes desia assez fortes, de se fortifier encore plus, & se mettre en tel estat qu'ils croyēt pouuoir impunement payer la trop grande indulgence du pere en rebellion contre le fils. Or en un mot, si les Huguenots sont capables de prendre le dessein de maistriser l'estat, ils le prendront aussi tost ceste fois qu'une autre. La paix ne leur donnera pas plus de moyen de le faire à l'aduenir, au contraire leur fera tomber peu à peu les armes des mains, & les rebellions de la ceste, que la guerre leur y fourre de plus en plus, en despit mesme que la plus part d'eux en ait.

Et outre les particulieres respōses aux rai-

sons cy dessus, se peut respondre en gros à ceux qui conseillent la guerre, & la maintiennent honorable, vtile, iuste, & necessaire au Roy & au Catholiques, qu'ils se doiuent donner garde que leur conseil suy ne face tout au rebours trouuer la guerre du costé des Huguenots honorable, vtile, iuste, & necessaire.

Les deux premiers par les effectz, les deux derniers par l'opinion du monde, puis qu'on ne veut les receuoir à obeissance & par dō. & qu'ils n'ont autre moyen de seureté de leurs vie & biens.

Car encore que ce pretexte soit faux en ce que nul subiect ne doit sous quelque cause que ce soit s'esleuer contre son Roy; & captieux, puis que le Roy les assure par ses Edicts, desquels ceux des Prouinces de deça se confient, & en iouissent, neantmoins les serrer trop pour rendre les villes d'hostage, & abbattre & desmollir toutes leurs fortifications, leur peut donner quelque iuste crainte de leur vie, & la iuste crainte de leur vie, quelque apparence coloree de garder leurs villes.

Car pourquoy demande on de Montauban & de la Rochelle ce qu'on ne demande pas d'Orleans & de Troyes, si Montauban & la Rochelle veulent obeyr comme Orleans & Troyes?

Donc la paix se doit & peut faire en ceste sorte;



Que demeurans dans l'entiere subiection  
 & obeïſſance, on leur laiſſera leurs villes en-  
 tre leurs mains, chacune iouyſſante des an-  
 ciens priuileges qu'elle auoit, deſquelles vil-  
 les ils reſpondront au Roy, & s'en rendront  
 deſpositaires, à peine de conſiſcation de touz  
 leurs biens, à laquelle ils ſe ſoubsmettront  
 volontairement & par traicté. Dedans y  
 obeyrôt au Royen toutes choſes, auſquel-  
 les celles de la meſme prouince, & de leur  
 voiſinage, obeïſſent. Payeront meſmes tri-  
 buts & charges, garderont meſmes loix, le  
 tout ſ'ils n'ont anciennes exemptions tou-  
 ſiours cōtinuées au cōtraire. Entretiendront  
 les Edicts, n'auront nulle garniſon dans les  
 villes. Dans les anciennes forterreſſes, les an-  
 ciens mortepayes ſeulement. Deſmoliront  
 les nouuelles fortifications de chasteaux,  
 & petites places par eux occupees: Les grā-  
 des villes ſeulement demeureront fortes, &  
 fortes des fortifications faiçtes deuant la  
 mort du feu Roy, car ils n'ont que faire de  
 villes ſi fortes dās le Royaume, ſ'ils ne veu-  
 lent point rebeller. Pour les mouuemēs des  
 peuples ſeditieux qui leur pourroient cou-  
 rir ſus, des ſimples murailles ſuffiront, & le  
 Roy les tiendra en protection de ſes Edicts  
 & de ſa parolle, tant qu'ils ſeroient obeyſſans.  
 Les Chābres de l'Edict mites & reiglees le  
 plus commodement qu'il ſe pourra. Com-  
 mandement eſtroict de rendre iuſtice ſans  
 diſtinction

distinction de religion, & d'empescher tous scandales & actes qui peuuent esmouuoit plaincte & sedition. Leurs assemblees permises de temps en temps, mais point ailleurs que dans Paris, afin qu'il soit sçeu du Roy & de toute la France, qu'il ne s'y traite rien que suiuant leur deuoir de subiects, & que ce n'est l'assemblee d'un party, mais d'une secte & sorte d'hommes separez du reste du corps, non quant à la subiection, commerce ou mœurs exterieures, & politiques, mais quant à la croyance & forme de seruice diuin seulement. Les assemblees particulieres pour deputer se feront sur les lieux, par le congé des Gouverneurs ou des Parlemens.

Tout le reste des differens sera aisé à accorder. Quand ils demanderont moins, ils tesmoigneront au Roy plus de respect & d'obeyssance qui meritera de luy plus de bien veillance & de gratuité. Quand le Roy leur donnera plus, ils devront se sentir plus obligez à sa bonté, & luy en demeurer plus fideles : ainsi de nul costé on ne se pourra plaindre, & tousiours faut qu'ils recognoissent que ce qu'ils obriendront du Roy leur sera octroyé par concession, pour en iouir tant qu'ils seront obeissans, non pour en faire loy ou consequence.

A toutes les raisons cy dessus, en response des raisons alleguées pour la guerre, se

peuvent adiouster les raisons pour la paix. Elles sont de longue main cogneues, & toutes claires.

1. Dans la paix le Roy est seul Roy dans son Royaume de nom & d'effect. Dans la guerre ciuille il y a plusieurs Roys, non de titre ou de droit, mais d'effect.

2. Dans la guerre ciuille tout ce qui s'y ruyne, soit par la mort des hommes, qui sont ordinairement les meilleurs, soit par la perte des biens d'une part, & d'autre tombe tousiours au dommage du Roy & du Royaume.

3. Les Estrangers en font leur profit, & y prennent leur mire pour nous coucher en jouë.

4. Ceux qui la conseillent, la conseillent pour leur profit particulier qu'il preferent à la desolation du Royaume que la guerre apportera: laquelle desolation fera tost ou tard faire la paix entre les deux partis tous deux lassez & harasses, Ce pendant le dommage qui en sera prouenu ne tombera que sur le Roy seul, qui paye à la fin tous les despens, & faut qu'il les paye; car nul ne les peut payer que luy, & faut qu'il les paye trois fois, vne fois à ceux qui l'ont seruy & suiuy, vne fois à ceux qui luy ont fait la guerre, & vne fois aux peuples qui en ont esté ruinez; & s'il ne le fait, encores dit-on qu'il a tort, puisque tous trois sont ses subjects esgallement, & que le Roy ne se peut plaindre, puis qu'il n'a pas



voulu plustost se mettre hors des termes de deuoir payer tous ces despens ; C'est à dire, qu'il n'a pas voulu faire la paix quand il n'y auoit encores rien de trop gasté.

5. La guerre ciuille ne peut qu'elle ne soit inutile, & sans fruct, si sans la guerre le Roy peut auoir l'obeyssance des subjects, qui est tout ce qu'il aura apres la guerre finie à son aduantage; car plus de droict ou de tiltre de souueraineté n'aura-il pas dans Montauban apres l'auoir pris, qu'il en a à ceste heure.

Mais aura-il pas lors plus d'obeyssance de ceux de Montauban, qu'il n'a à ceste heure? Ouy sans doute; car s'il les prend de force, il fera mettre tous les habitans à la chaisne, s'il veut: Auquel cas il faudra qu'ils obeyssent plus serré qu'ils ne font à ceste heure, & qu'ils ne feront iamais par aucun traicté de paix: Mais ceste façon d'obeyssance, ny quelle qu'il ait d'eux par la force, ne luy sera iamais si vtile que celle qu'il peut auoir d'eux par la paix; car ils ne sçauroyent, apres auoir souffert la force seruir le Roy avec tant d'honneur, de profit, & de plaisir pour luy, qu'ils peuuent faire à ceste heure. Qui ne constituera l'honneur, le plaisir, & le profit à la seule vengeance? A ce seul desseing la guerre sera aduantageuse, pourueu qu'on soit assuré de venir à bout de ce qu'on entreprend; A nul autre ne le peut estre.

La guerre donne trois qualitez aux subjects

que les Roys doyuent grandement craindre de voir en eux : Elle les rend

Orgueilleux. Car par la guerre ils traittent du pair & compagnon avec leur maître : de part & d'autre esgalement fanfares de Trompette, & coups de canon : qui n'en a pas tât de son costé a de fortes murailles en recompense. On fait vn bandon dans le camp de par le Roy, & à vn quart de lieue de la vn autre de par monsieur de Rohan, ou de la Force, & peut estre de par monsieur le Maire de la ville, & tousiours vainqueurs ou vaincus, les subjects rebelles ont le plus grand honneur : C'est plus grand honneur à vn Capitaine d'auoir deffendu vne ville contre le Roy, qu'au Roy d'en auoir pris cent ; Que s'il la deffend & la garde sans qu'on la prenne, encores mille fois plus. Fuir deuant le Roy ou luy rendre vne place, n'est pas honre pour les subjects ; tenir teste est honneur, duquel bien que meslé avec l'execrable peché de rebellion, on rend aysément les subjects si friand par la voye de l'orgueil, principalement quand la loüange des armes y est meslée, qu'ils ne veulent plus iamais faire autre chose, & s'endurcissent en ceste frenaisie, & gare le heurt apres.

Desesperez : Car croyans qu'ils ne peuuent auoir salut que par se bien deffendre, ils s'y resoluent, & le croyent, quand ils voyent qu'on leur fait perdre toute esperance de

paix:& contre des defesperez, il y a tousiours à perdre,& iamais rien à gagner.

Aguerris . Or ceste qualité qui de foy est bonne , est tref-dangereuse aux ennemis , & toutes trois encores plus dangereuses aux propres subjects , quand de loyaux subjects ils sont deuenus ennemis.

Quel doncques semble le meilleur conseil? Faire la paix, leur en proposer des conditions telles qu'on peut donner à des subjects , demeurans dans l'entiere subjection ; s'il faut vn peu guerir leur deffiance , afin qu'ils ne fassent point barriere de la crainte de leur vie. he ! bien. A cela il leur faut & promettre & tenir loyalle seureté, les faire traicter par tout esgallement en leur vie & biens, comme les autres subjects , sans distinction. En tout ce qui est de la Iustice de mesmes. En ce qui est des gratuitez, ils n'y peuuent ny n'y doyuent contraindre le Roy , sinon autant qu'il iugera aux occasions que leur fidelité & seruice l'auront merité. S'ils sont si temeraires de vouloir s'opiniastrer au contraire , c'est lors qu'il y faut mettre la derniere main : Ce pendant les supporter vn petit, les laisser doucement reuenir à eux, oublier le passé, gagner les meilleurs par carresses & bien faicts, tenir parole sincerement enuers tous , faire chastier exemplairement dans les Prouinces ceux qui par audace enfreindront les traictez. Ce qui se faict souuent d'vn costé &



d'autre à dessein de remettre le Royaume en combustion & de r'allumer la guerre. Sur tout ne leur donner point sujet de venir à chaque fois faire plainte au Roy, & luy demander Iustice.

Mais reste la plus grande & derniere difficulté, le moyen pour paruenir à ceste paix. Elle sera iugée vtile par la plus grande partie des bons & des sages. Ceux qui la voudront empescher & n'oseront faire ouuertement, y trouueront des obstacles au traicté : c'est en quoy on est d'ordinaire le plus empesché ; car quand on est assemblé, nul des deux partis qui sçauent le blasme qui accompagne les traueses qu'on a donné par opiniastrété à vne si bonne œuvre, & les mal'heurs qui suivent vn tel reproche, qui sont les haines & les deffiances de tous ceux du party, & les maledictions de tout le monde ne veut iamais tomber en ce mal'heur, & par ainsi tout s'accorde à la fin.

Mais auant que s'assembler pour en traiter, il y a infinis moyens pour empescher ceste assemblée. Les Esp' gnols & Holandois y furent plus de deux ans lors qu'ils firent la trefue, combien de temps y fut-on en France durant la Ligue? autant que la Ligue dura, on commença à proposer la paix au sortir de Dieppe 1589. on ne fit la trefue qu'en l'an 1593. la paix qu'en l'an 1595. à la fin.

Cela vient de ce qu'il semble qu'il est peu

honorable , principalement au maistre , ou au plus fort , de parler le premier de paix , & sous pretexte de cet honneur , on trouue mille moyens de destourner ou empescher la Conference. Au contraire chacun confesse qu'il est honteux de vouloir s'opposer au traicté de paix , quand on a commencé à la proposer , c'est pourquoy on ne s'assemble gueres qu'on ne la conclud. Monsieur de Villeroy me dit à Lodun qu'il auoit assisté à 19. traictés de paix, qu'il n'auoit iamais trouué moyen aysé & facile pour faire conuenir les parties à vouloir s'assembler pour traiter la paix , ny moien difficile & malaisé pour la conclurre, quand ils estoient assemblez.

C'est pourquoy la plus grande difficulté sera à trouuer les moyens de s'assembler pour la traicter : Ceux qui ne la desirent du costé du Roy, diront

1. Que le Roy ne doit pas ployer à tesmoigner qu'il vueille la paix.

2. Que s'ils y laisse entendre, cela rendra les Huguenots plus orgueilleux & plus opiniastres.

3. Que c'est faire tort à son autorité.

4. Qu'il ne doit seulement ouyr parler de traicter avec des subiects ; tout ce qu'il peut faire est de les receuoir, sans autre Capitulation à simple pardon , & à nuë obeissance, laquelle s'ils n'enuoyent purement offrir, il ne doit les escouter.

5. Qu'il ne doit traicter avec eux comme avec vn corps, attendu qu'il y a distinction expresse entre les Huguenots obeyssans, qui vivent sous la protection du Roy, & desaduoient les autres, & les Huguenots rebel-lans.

6. Qu'encores parmy les Huguenots re-bellans il y a distinction; car l'un peut preten-dre des priuileges particuliers, comme la Ro-chelle; l'autre des iustes craintes, comme les villes non fortes; l'autre des interests d'ac-cords, de concessions, de Chambres de Par-lements, & autres choses: Partant pour tou-res ces raisons ils ne doiuent traicter en corps mais chaque ville en particulier.

7. Que nul de leurs chefs n'est capable de traicter pour autre que pour luy meisme, par-ce qu'il ne peut auoir pouuoir de tous les autres. Ainsi donc qu'il ne se peut traicter valablement. Car de reduire les choses de traicter avec chaque personne, ou avec cha-que ville separement, sera reduire les choses à ne traicter iamais. Ce seroit vne confusion, & vne longueur trop grande. D'ailleurs trai-ctant avec vne partie, ne faudroit laisser de contraindre l'autre par les armes: ce qu'eux preuoyans, ne voudront iamais tricter que vnis. Ce qui ne se pouuant faire pour les rai-sons que dessus, qu'il vaut donc mieux n'en-tendre à aucun traicté, mais suiure la poincte.

8. Qu'ils se veulent seruir du pretexte du  
traicté



traicté pour prendre langue des intentions & forces du Roy, pour suyuant cela prendre leur party. Au lieu de traicter, qu'il faut aller à eux.

9. Que le traicté ne seruira qu'à leur dōner temps de se mieux munir de fortifications, d'hommes, viures, armes, munitions.

10. Qu'ils ont sollicité les estrangers de se joindre à eux, & les assister en leur cause? partant ne doiuent estre receuz à traicter avec leur Roy.

11. Qu'ils n'ont gardé les promesses qu'ils auoyent faictes, tesmoin Soubize, ceux de Mon-heur Clairac, Sainte-Foy, les entreprises sur Nauarrins, Bergerac, & beaucoup d'autres qui se peuuent rapporter.

12. Et finalement ceux qui desirent la guerre descrieront ceux qui donneront conseil de paix au Roy, & les chargeront obliquement de blasme & de mespris, comme s'ils auoyent intelligence avec les Huguenots, regret de n'auoir point de grandes charges dans la guerre: ialousie contre ceux qui en lieu guerroyable, & autres reproches.

A tout cela se peut respondre.

A la premiere, qui porte que le Roy ne doit ployer à tesmoigner qu'il desire la paix; Se respond, Qu'au contraire, la premiere loüange qu'on peut donner à vn Roy, est qu'il desire que ses subjects, comme vn bon pere ses enfans, soyent en leur deuoir enuers luy.

& par consequent, bien avec luy.

A la seconde, que leur offrir la paix est les rendre plus orgueilleux & opiniastres ; Se respond qu'ils sont desia orgueilleux & opiniastres iusques au dernier degré, puis qu'ils soustiennent la guerre contre leur Roy. Le tesmoignage de sa bonté les obligera au contraire (aux termes qui sont les affaires) à se soubmettre à sa volonté, & se confier en ses promesses.

A la troisieme, que tesmoigner par le Roy qu'il veut la paix, fait tort à son autorité; Se respond que cela seroit vray si luy autrement que comme Roy traittoit avec eux autrement que comme avec ses sujets, ou eux autrement que comme sujets traittoient avec luy autrement que comme avec leur Roy.

A la quatrieme, qui porte que le Roy ne doit faire aucun traité avec eux, seulement les recevoir à simple pardon & obeyssance; Se respond qu'ils n'enuoyeront pas offrir l'obeyssance en general, car ils recognoissent qu'elle est deue, & qu'elle a tousiours subsisté, ou deu subsister : Ce qui est bien plus, Traicter avec eux sur le pardon du passé, & seuretez pour l'aduenir, est chose qui s'est faicte plusieurs fois en France, & ailleurs par les Princes envers leurs sujets, sans diminution de l'autorité souueraine.

A la cinquiesme, que le Roy ne doit trait-

terauec eux comme avec vn corps? Se respond qu'il seroit bon que ce ne fut plus vn corps, c'est à quoy il faut rendre pour l'aduenir? pour le present cela ne doit empescher le bon œuure de la paix.

A la sixiesme qui porte qu'il y a distinction entre les Huguenots rebellans, car ils ont diuers priuileges, & diuers interests considerables? Se respond qu'on doit garder les anciens priuileges, & en ce qui ne blessera point l'autorité du Roy, ou le bien general du Royaume, asseurer les deffiances, & reigler leurs interests, pour telles choses on fera articles particuliers pour les Prouinces ou villes particulieres.

A la septiesme qui porte qu'il est impossible de traicter avec eux, parce qu'ils n'ont point de chef capables de traicter pour tous? Se respond en gros & en general que le Roy veut que tous ses subjects luy obeyssent, en luy obeyssant qu'ils viuent en paix, il donnera la paix à tous, chacun en sentira le fruiet.

A la huitiesme qui porte que les Huguenots prennent aduantage du traitté de paix? Se respond que cela seroit vray si ce pendant on tenoit les bras croisez: mais il faut tenir la plume d'une main, pour signer la paix, de l'autre? l'espée pour leur donner sur les oreilles s'ils font les fascheux, & laquelle il faudra à mesme temps faire iouer ouuerte-



ment, sans aucune relasche n'y misericorde.

A la neuuesme qui porte que le traitté & ouuerture de paix leur donne loisir de se fortifier & munir de tout? Se respond qu'il ne faut pas douter qu'ils ne soyent tresbien aduertis de tout. Aux guerres ciuilles, les espions ne manquent iamais, joinct qu'il n'est plus de saison d'essayer de les auoir par la ruse ou par la surprise.

A la dixiesme, fondée sur les pratiques & intelligences qu'ils ont eues, ou voulu auoir avec les Estrangers; Se respond que le plus court moyen de les faire renoncer aux pratiques Estrangeres, & de les reünir volontairement à la premiere subjection & obeysance, est leur donner la paix.

A l'onzieme, fondée sur ce qu'ils n'ont gardé en beaucoup de choses les promesses qu'ils auoyent faictes, Se respond que ce qui a esté fait contre le droict accoustumé de la guerre, se peut examiner separément, vne partie excuser, vne partie pardonner, vne partie comprendre sous le traitté, Et si il y a quelque petit chastiment qui reste à faire, estre donné à la Clemence du Roy, au bien de la paix, à la priere des intercesseurs, ou à quelqu'autre couleur gracieuse; cela ne doit empescher vn bien general.

A la douzieme, qui regarde les calomnies dont on chargera & deschirera ceux qui voudront persuader ou s'entremettre de la

paix ; Se respond que ceux qui ont en teste & pour but vn dessein hault & magnanime, tel qu'est celuy du bien de tout vn Estat, doyent estre munis d'une magnanimité respondante à leur dessein, qui leur doit faire mespriser non seulement les reproches qu'on leur pourroit faire, mais les personnes mesmes qui leur font la reproche, qui tesmoignent de l'enuie & de la malignité en leurs propositions, puis qu'ils prennent à tasche de contrarier vne chose bonne ; cela ne doit retarder les gens de vertu & de courage qu'ils ne continuent plus vigoureusement la carriere qu'ils ont entreprise. Fabius Maximus fut taxé par les ennemis de trahison, par les siens de poltronnerie. Il ne flescrist point à ces bruits là, & perseuera à sauuer l'Estat Romain. Ceux qui conseilleront la paix en auront l'honneur à la fin, si leur conseil est par l'issue iugé utile ; comme il sera (à mon aduis) soit qu'on le suyue, soit qu'on le refuse. Si les hommes ne la font à ceste heure, Dieu la fera en son temps, ou ie me trompe.

Quoy donc ? le Roy fera il vne paix honteuse avec ses sujets ? La paix, ouy ; honteuse, non. Entre vne guerre calamiteuse & ruineuse & vne paix honteuse il y a des milieux : Sile Roy y employe des hommes sages, vertueux, & non interessez, ils en trouueront les moyens faciles.

Qu'ils soyent recogneus tels de ceux qu'on veut ramener à raison, ils y prendront confiance, & se mettront en leur deuoir; c'est le seul secret.

Mais par ce que (comme j'ay desia dict) la plus grande difficulté tombera sur la forme & moyens de traicter la paix, sur ce que du costé du Roy ceux qui ne l'approuuent, ou ne la desirent pas, pour l'empescher prendront pretexte de la grandeur & dignité Royale, qui ne doibt pas iusques là s'abbaïsser de demander la premiere la paix à qui que ce soit, moins à ses subjects; & que du costé des Huguenots ceux qui ne la desirent pas aussi (car il y en a tres peu entr'eux qui en leur ame la desapprouuent) prendront pretexte que s'ils demandent les premiers la paix, ils tesmoigneront tant de foiblesse, qu'on cherchera plustost en se hazardant de les accabler qu'en s'asseurant de les reünir: & que par cet obstacle nul traicté ne se fera, puis qu'il est impossible que deux parties tombent en accord de quelque affaire si l'une ne le propose à l'autre, ou si vn tiers n'est interposé comme mediateur. Or en cecy il n'y peut auoir de tiers ou de mediateur. Entre les François nul ne le peut estre, car tous les Huguenots (j'entends ceux qui rebellent & soustienent la guerre) sont ennemis; tout le reste des François sont seruiteurs, & par consequent partisans du Roy. Entre les estrangers

il n'y en peut auoir non plus. Tous les autres Princes estrangers ne doiuent en sorte du monde estre admis à demander ou proposer la paix entre le Roy & ses subiets, ny seulement escoutez, sinon entant qu'ils offriront seruice & assistance au Roy, s'il en a besoing, comme ils y sont tenus. Le Pape, qui seul entre les Princes estrangers ne peut estre dict estranger, puis qu'à cause de l'Empire spirituel qu'il tient sur les Catholiques, il est tousiours entr'eux le mediateur legitime & non recusable en ce qui est du temporel, (quand il est luy-mesme hors d'interest temporel) ne peut neantmoins icy estre mediateur, parce que sur les heretiques & schismatiques qui ont abiuré l'obeyssance au Sainct Siege il n'a nul pouuoir que pour les condamner: partant ne peut traicter pour eux, estant luy-mesme leur vraye & irreconciliable partie.

Pour resouldre ceste difficulté, ie maintiens qu'il n'ya qu'un bõ & honorable expedient, pour lequel esclaircir & iustifier, premiere-ment ie pose en fait, que celuy des deux qui tesmoignera le plus desirer la paix, tesmoignera plus de magnanimité & generosité. C'est generosité aux Huguenots de tesmoigner que presuppósé qu'ils peussent se rebel-lans se soubstraire de la subiettion & obeissance (ce qu'ils scauent pourtant qu'il sera trouué impossible & faux) neantmoins ils



proposent d'un desseing volontaire se remettre & demeurer dans la iuste & legitime subjection: Ceste loyauté de vouloir franchement obeyr à son Prince legitime est entre toutes la plus noble & plus releuee piece d'un cœur de gentil'homme. La preuue en est qu'elle produict tousiours infinis effects de magnanimité de diuerses sortes, iamais nul de lâcheté. Or ceste loyauté, que nous pouuons appeller ancienne, puis que de temps, en temps les François en ont esté si ialoux, encore qu'en particulier elle soit fort abastardie dans le proceder de ceux de ce siecle, en gros neantmoins tient tousiours bon dans les conseils vniuersels? ie dis mesme parmy les Huguénots, & specialement parmy la Noblesse, de laquelle, quoy qu'il y ait, les villes de leur party ne se sçauroyent separer, ny sans elle se defendre, ou resister. Or le plus grand creue-cœur qu'ils ayent en la guerre qu'ils soustiennent, est, qu'ils la soustiennent contre leur Roy: Ie le sçay de science & d'experience, ayant autresfois passé par là: & leur Religion qui par societé & opiniastrété les induict à rebeller, par doctrine leur defend absolument; ie dis doctrine nullement ignorée ou debattuë par aucun d'eux; si bien qu'ils peuuent estre aysement conduicts par ceste maxime au desir de persueuerer dans la loyauté, & par consequent au desir de la paix: & encore en suite au desir de demander &

vouloir la paix ; Car ceste demande est tousiours censée & reputée, à leur iugement mesme , honorable à des subjects enuers leur Roy.

Mais ie dis & soustiens aussi que c'est la premiere & plus certaine marque de magnanimité au Roy de desirer & procurer la paix. Si sa charge l'oblige de conseruer la vie de ses subjects, mesmes avec le hazard de la sienne, qui seroit sans doute vn effect de rare magnanimité, elle l'oblige encores de mesmes de leur conseruer la vie par la voye de la paix, avec non moindre loüange de magnanimité. La grandeur, dignité & Majesté Royale ne se peut dire rabbaissée pour auoir procuré avec vn desir ouuert & manifeste de sauuer la vie à tant de milliers d'hommes que la guerre fera mourir, & empesché tant de hontes, miseres & calamitez qu'elle produira. L'honneur du Roy, dont on fait barriere, se doit conseruer entier; mais ouy dans le traicté de paix, non par le tesmoignage qu'il rendra de ne la vouloir pas : & pour preuue il faut auant tout tenir ces deux maximes pour constantes & certaines: L'une, que si le Roy ne pouuoit par la guerre entierement des-faire & exterminer les Huguenots, ce ne seroit pas honneur à luy de la commencer contre eux. L'autre, que si il les peut ruyner & exterminer, ce sera en quelque sorte honneur ; considéré simplement &

separément, Pangonné & mis en balance avec celuy de les sauuer, n'est plus honneur, mais tres-grand blasme. Qu'elle louïange seroit celle qui seroit donnée a vn Roy d'auoir exterminé quantité d'hommes qu'il auroit peu sauuer, spécialement d'hommes ses subiects.

Qu'est il donc de faire? voicy mon aduis, qui se trouuera ou par le commencement ou par la fin le plus profitable & le plus honorable. Premièrement il faut demeurer là, que la paix est preferable à la guerre. La paix se doit desirer par vtilité, la guerre se doit faire par nécessité, c'est à dire en cas d'impossibilité de paix. Vouloir mettre en balance esgale la simple proposition de la paix ou de la guerre, est errer aux principes: Donc le Roy ne doit ny craindre, ny feindre de dire qu'il veut la paix; faisant voir quand & quand que s'il ne la peut auoir, qu'il sçait & peut faire la guerre: & faut partant separer le conseil de l'affaire presente en deux, l'un pour resouldre à quelles conditions le Roy donnera la paix aux Huguenots, l'autre (en cas que la paix ne se face) pour resouldre de quelle façon on leur fera la guerre.

Pour le premier, le Roy doibt assembler nombre d'hommes d'aage & d'experience, sages, loyaux & fidels, de probité cogneuë, qui par leur fortune & leurs affaires domestiques tesmoignent qu'ils n'ont iamais cher-

ché leur aduancement, ny adheré à la corruption ; c'est la seule preuue qu'on peut aujourdhuy prendre du cœur & de la volonté des hommes, & de l'integrité des Conseils qu'ils donneront, & qui ne sont cogneuz que par la seule loüange de vertu incontaminée que chacun leur donne, dont il y a encore quantité dans son Estat, Dieu mercy.

Auec eux le Roy examinera les conditions de paix qu'il doibt donner aux Huguenots, mettant sur le tapis toutes les circonstances qui y doiuent apporter poids. Deuant toutes marchera l'honneur du Roy, son autorité, l'obeyssance qui luy est deuë : en suite la conseruation de tant de subiects, qui d'un costé bien & doucement mesnagez, peuuent vtilement seruir par de là mesmes ce que l'on demandera d'eux, si le cas y eschet ; de l'autre qui trop pressez & outrez, peuuent par desespoir se cabrer, & par ainsi tousiours porter preiudice à l'Estat, ou par leur iniuste rebellion pleine de violences, ou par leur immisericordieuse ruyne pleine de dommage. Examiner les traictez de paix qu'ils ont eus autresfois, les differences du temps passé au present, les raisons qui les meuent à demander des libertez ou aduantages particuliers, & les raisons qui doiuent mouuoir le Roy de leur refuser, mesmes les accoustumez, sans pourtant que ceste disquisition sorte hors des termes de la paix, mais les con-



fiderant comme le seul but defirable, arrefter  
 les articles du traicté, lesquels refolus, le  
 Roy non comme chef de party, mais com-  
 me Roy; non comme tenant affiegées par  
 fes lieutenans de petites bicoques reuoltées,  
 qui encore apres vn long fiege, ahannent à  
 fe rendre; mais comme diffipant par le clair  
 foleil de fa prefence les broüillars de la re-  
 bellion aux endroicts où ils paroiffent plus  
 efpais, & d'une brusque & viue caualcade  
 aduancé à la teſte de fon armée, atterrant &  
 forçant ceux qui s'oſent trouuer en armes  
 deuant luy, & font mine de luy vouloir fai-  
 re teſte à la faueur des lieux inacceſſibles où  
 ils ſont logez, non comme demandant la  
 paix, mais comme la commandant, les en-  
 uoyera publier parmy eux par perſonnes ſa-  
 ges & fidelles, de qualité eminente & d'hu-  
 meur douce, & qui ſont recogneuës aymer  
 plus le ſeruice du Roy & le bien general que  
 le particulier. Apres quelque peu de temps  
 qu'on leur donnera pour ſ'aſſembler & ſen-  
 tr'entendre, ſ'ils l'acceptent, leur faut tenir  
 promeſſe, enuers tous vn Roy l'a doit tenir  
 enuers ſes ſubiects plus ſainctement, puis  
 qu'il a plus d'intereſt d'eſtre loué & honoré  
 d'eux que de nuls autres.

S'ils la refusent, c'eſt lors qu'ils monſtrent  
 ouuertement leur mauuais courage; c'eſt  
 lors auſſi qu'il faut venir au dernier chaſti-  
 ment, mais chaſtiment digne de la Maieſté

d'un si grand Roy, & Roy d'un si grand Royaume. Pour cet effect faut que le Roy s'y porte tout entier, & qu'il y porte la fiance toute entiere: Qu'à ce dessein il assemble en diligence ses Estats dans le milieu de son Royaume, à Bourges, Poictiers, ou Limoges, là que luy-mesmes present, leur face clairement entendre avec vn magnanime courroux la rebellion qu'une partie de ses subiets oppose à l'obeyssance qu'ils luy doivent, avec vne paternelle plainte; l'orgueil qu'ils opposent au pardon & retour en grace qu'il leur offre, avec vn iuste ressentiment la defiance qu'ils veulent mettre en balance, avec les promesses qu'il leur fait de reestablishement à tous leurs biens & droicts. Sur le tout demandera aux Estats non plus conseil, qui ne se peut prendre sur la derniere pertinacité de subiects reuoltez, que du chastiment entier qu'il en faut prendre, mais ayde & assistance pour y mettre la main.

Il est certain que les Estats ne refuseront iamais de se porter au nom de tout le Royaume, à l'execution d'un desir que le Roy leur fera voir si honorable & si iuste; que s'il ne leur en faisoit l'ouuerture le premier, ils l'aferoient au Roy: si le Roy ne leur en demandoit les moyens pour l'executer, ils luy feroient tres-humble supplication de les recevoir d'eux. Ce qui sera par eux resolu, & offert au Roy, sera quand & quand enuoyé

dans les Prouinces pour y estre publié, protesté, & iuré par tous en general, & chacun en particulier? & il est certain encores qu'il n'y aura Prouince, corps, communauté, ville, ou congregation, qui d'un franc courage & d'une ialouse affection, n'accorde au Roy ce qui sera de son pouuoir pour vne telle œuvre, & finalement il est certain qu'il n'y aura nul particulier qui n'y contribue son temps, son bien, son credit, ses armes, chacun en sa condition. Qui est ce qui refuseroit rien de tout cela pour vn subiect qui semble conuier tout loyal François à y donner sans regret sa propre vie? Qui est ce qui ruminant la fin pour laquelle le Huguenots refusent par extresme opiniastrété la paix que le Roy par extresme bonté leur offre, ne desseigne d'estre de la patrie de leur faire sentir avec leur mal le regret de n'auoir accepté leur bien.

Mais faut alors que la main suyue la parole, que le Roy à la teste esbranle son Royaume d'un bout à l'autre, & le mene accabler & la rebellion, & les rebelles.

Que tous les canons, toutes les munitions, toutes les armes, tous les corps des combattans de tout le Royaume entier choquent tout d'un temps ceste Hydre: Que le fer & le feu la portent par terre en sorte qu'elle ne s'en releue iamais: au contraire que la memoire en demeure mesmes enseuelie dans la



ruyne de tous les lieux où elle a tenu teste.

Or à ce grand effort est il pas certain que les Huguenots auront bien auant le diable dans la fantaisie s'ils ne se recognoissent, & ne viennent à raison telle qu'on desirera d'eux? Il y faut proceder ainsi; l'honneur & la dignité & du Roy & du Royaume requerront cela. Vne grande vengeance doit estre hautement & dignement executée. Quand Dieu voulut perdre la terre par le deluge, il assembla les eaux au soufflé des quatre vents du Ciel, non par nécessité: mais par Majesté: De mesme la paix refusée doit estre vengée & chastiee des effects du courroux de tous les François qui y ont tous interest. Et par ceste voye tout ainsi que le Roy sera caution enuers son Royaume, que la guerre est tout à faict iuste, puis qu'il a faict tout ce qu'il a peu & deu pour luy donner la paix & ne l'a pourtant eue; ce qu'il veut que le Royaume sçache: De mesme le Royaume entier sera caution enuers son Roy de l'heureuse issue de la guerre, puis qu'il promet & proteste de luy fournir toutes ses forces pour le seruir en vne si honorable entreprise, en laquelle Dieu qui est luy-mesme meslé en quelque sorte en la querelle, se mettra sans doute de la partie, & favorisera les iustes effects & du Roy & du Royaume, & les conduira à l'honneur & de tous deux & de luy-mesme à la glorieuse fin.



Voilà le PETIT ADVIS d'un  
ferme Catholique, loyal François,  
humble subject & fidele serviteur du  
Roy.